

lis Gnovis

■ UDIN. Laris di bicicletis



Si ricuadriso il film "Ladri di biciclette", un dai miôr film dal neorealism talian, jessût tal 1948? Al contave di un disocupât che al cirve di cjatâ la sô biciclette robade a Rome. Po ben, ançe a vuê a'ndi son di laris di bicicletis, te capitâl dal Friûl: a cualchidun di chescj no i displâs di cjolilis in comodât gratuit magari dome parcè che i va di cane par no fâ un toc di strade a piduline, e po dopo lassâle di cualchi bande, cence visâ il paron. Dant cussi lavôr ae polizie dal Comun, che di lavôr 'nd a fin masse. Tal mès di Mai, a Udin, i vijii a'nd an tiradis dongje vot, ma di sigûr, in Istât, a'ndi recuperaran di plui. Ma al po stâi che cualchidune e sedi ançe stade dismenteade dal proprietari che, cence diventâ mat par cirîle, al pues lâ tal dipuesit comunâl des robis pierdudis, dulà che si cjate di dut, fale il cjâf di chel che lis à dismenteadis, e recuperâle. E chês che a restin cence paron? Passât un an, la leç e previôt che, come par ducj i ogjets no reclamâts, a puedin jessi metudis in vendite ae aste. Insume, in cualchi mût si cumbine. Ma al reste che cui che al decît di bandonâ la biciclette parcè che no va plui o par vie che al costarès masse metile a puest, il so smaltiment al va a tocjâ la sachete dai citadins, e alore la direzion no varès di jessi chê dal Comun, ma ben chê di une disjarie.

■ FRIÛL. Pocje mîl chest an?

L'avon (cui no lu saial) daspò dal so svol nuviçâl cu la âf regjine, al sa ben che daspò di chel incuintri fortunât i restarà pòc timp par vivi tal boç cu lis altris âfs: tor Otubar-Novembar al ven mandât vie di cjase parcè che nol è bon di fâ nuie pe comunitât, e al costarès masse mantignî chest pucefadie. Ma chest an al sta succedint alc che al preochepe une vore i apicultôrs: lis âfs a mandin vie in anticip i avons e si viodin ançe cês di canibalisim des piçulis larvis e une diminuzion de produzion de mîl. Nol è che lis âfs che a van ator pai prâts a cirî il polin a sedin jentradis in siopar: cuant che al plûf, no puedin lâ fûr dal boç e flôrs di impolinâ a'ndi restin simpri di mancual. Insome, no dome masse ploie, ma ur mancje ançe la materie prime.

■ RAI REGIONÂL. Programs par furlan

Il canâl 810 dal digjitâl terestri, o ben Rai 3 bis, ogni martars, des 14.20 e aes 21.20, al trasmet, cuntune repliche di vinars, programs par furlan produsûts de sede Rai regionâl. Su la fonde di un acuardi tra la Presidence dal Consei regionâl e la Rai, si son zontadis 30 oris di trasmission tv par furlan, adun cul potenziament de produzion radiofoniche, che e passe a 120 oris. I programs a previodin cartons animâts pai plui piçui scomençant des 14.20 daspò dal tg regionâl, mintri te fasse serâl la ufierte culturâl e sarâ pardabon varie: spetacui teatrâi, cines, documentaris e videos cun colaborazions di presi che a podaran dâ un gnûf sburt par rindi la lenghe furlane ancjemò plui protagoniste tal di vuê.

Miercus 17	S. Alessi mendic	Domenie 21 XVI Domenie vie pal an	
Joibe 18	S. Fidri vescul	Lunis 22	S. te Marie Maddalene
Vinars 19	S. te Macrine muinie	Martars 23	S. te Brigjide de S.
Sabide 20	S. Elie profete	Il timp	Zornadis cjaldis



Il soreli
Ai 17 al jeve aes 5.33
e al va a mont aes 20.53.



La lune
Ai 21 Lune plene.


Il proverbi
In cent agns e in cent dis
la aghe e torne tai siei pais.
Lis voris dal mès
I strops e lis jechis a van tignûts bagnâts
cun aghe polsade.

Dolfin, l'ultin patriarcje tun romanç di Elio Bartolini

Jessût un pôcs di agns
indaûr, si clame
"Pontificale in San Marco"

Cuntune "bole solene", publicade tal Lui dal 1751, Benedet XIV al sopprimeve e al faseve vigni mancual in perpetui "nella mentovata città e Chiesa di Aquileja, la cattedra di dignità, sede, titolo e denominazione patriarcale etc, etc", metint sù, tal stes timp, il Vescovât di Udin pe part dal teritori sot di Vignesie, e di Gurize par chei sogjets ae cjase di Austrie. Al jere bastât un sfuei di bergamine par decretâ la fin di une Glesie cetant gloriose pes sôs originis antighis, pal so ordenament e pe sô liturgjie, che a lavin indevant di saecula saeculorum.

La altre vitime al jere stât Denêl Dolfin, venit e patriarcje. E il Dolfin patriarcje, "sua celestitudine", al è il protagonist che intor di lui si davuelç cheste pagjine de nestre storie, contade di fâ gole di Elio Bartolini, intun grant romanç furlan, jessût un pôcs di agns indaûr: "Pontificale in San Marco". Bartolini nus veve abituât a chest so straordenari mût di contâ la storie midiant personaçs impuartants calâts te lôr umanità, a chest fâsi de storie par mieç dal romanç, che in chest cês al tache cuntune maraveose descrizion di un quadri che al rapresente la rivade dal Dolfin a Vignesie. Un quadri contât par secuencis tal so divignî, dulà che Dolfin si spiegle e si ricognòs come un personaç "reso nella curialesca maniera cui amavano essere descritti i Bousset, i Richelieu, i Mazzarino: la stessa gravità dello sguardo, la stessa sontuosità delle vesti, la mano sinistra all'oro del pettorale". Dome che chei personaçs a jerin di bessôi, tal lôr ritrat. Dolfin invezit, lui no. Lui, tal quadri, al ven piturât tra doi grups: chel de çurme che lu compagne, e chel dal predessam e dai dignitaris che lu spietin in bancjine. Parçè che il quadri al à di mostrâlu, come intun



Elio Bartolini

trionf, al so rivâ a Vignesie, e al à di vè une didascalie che e dedi sodisfazion, dal gjenar: "La rivade a Vignesie dal Dolfin patriarcje di Aquilee".

Cussi, par un striedç che dome la grande letature e sa evocâ, il quadri al cjape vite e al devente azion seniche. Chel che il quadri nol conte al è che Denêl Dolfin al è l'ultin patriarcje che tal Avrîl dal 1751, pòc prime di chel Lui cuant che il pape al condanarà il Patriarcjât ae muart, al sta tornant a Vignesie ofindût dai mançs, nancje masse segrets, tra Imperi e Curie Romane, e combatût tra lis resons de ubidience e chês de storie.

Une cjame masse pesante pal Dolfin, masse superiôr pes sôs fuarcis, e cence rispueste o, miôr, cun rispuestis contraditoriis: jessi Glesie e acetâ chel che al sta par complisi, o jessi podè te continuitât de storie. Pal pape, insot insot, Aquilee no je "che un povero abitato pieno di malaria, e di abbandono", ma pal Dolfin il Friûl al è une tiere "fiera, con quei borghi silenziosi come nell'incubo

perenne di un'invasione, la loro miseria che, non volendo apparire, cerca compenso nel lustro, nel riassetto". A une fedeltât une altre si opon. Ma biel che pal pape, jessint il Patriarcjât assumût a esempli de lote che Rome e veve puartât indenand cuntri ogni pretese patriarcjâl che le menaçave, la uniche fedeltât e je chê di vinci un nemî intransigent, pal patriarcje si trate di sielzi tra ubidience e storie. Dentre tal so cûr, Dolfin al à za decidût; il Dolfin spirituâl, ma inceât des seduzions de cjar, al acetarà la sopression dal patriarcjât, ma al pretint di celebrâ in Sant Marc l'ultin pontificâl cul rit patriarcjin.

Il Pontificâl nol vignarà mai celebrât se no tal so insium. E cu la descrizion di Bartolini, che al conte in pagjinis inceosis i passaçs spirituâi di chel insium, segnâts de terminologjie latine de liturgjie, e compagnâts dai glons di une cjampane a muart, al mûr ançe chel bocon di storie che Dolfin al varès volût continuâ a vivi.

Roberto Iacovissi

Cirf, cors di furlan pai students

Tant che ogni an, il Centri Interdipartimentâl pal Svilup de Lenghe e de Culture dal Friûl (CIRF) de Universitât dal Friûl al organize un cors gratuit di lenghe e culture furlane pai students dal Ateneu e par ducj i zovins interessâts a cognossi miôr la ricjece de nestre tiere, sedi a nivel linguistic, sedi par chel che al inten la storie, lis tradizions e il teritori. La prime lezion si fasarà ai 2 di Setembar dal 2024 e si larà indenand ducj i lunis e i miercus, des 2 e mieze aes 5 e mieze daspò misdî, fin ai 2 di Otubar, par un totâl di 30 oris. Il cors al è sore nuie e si tignarà in linie, su plateforme informatiche Microsoft Teams. Il program al previôt elements di fonde di grafie e di gramatiche furlane, adun cun

nozions di culture e di storie dal Friûl. Cun di plui, vie pes lezions a vignaran presentâts ançe i ents principâi pe promovion de lenghe e de culture furlanis, ven a stâi la Agenzie regionâl pe lenghe furlane (ARLeF), la Societât Filologjiche Furlane e la Cooperative Informazione Friulana/Radio Onde Furlane, che a colaborin ae iniziative. A ducj i iscris ur vignarà dât un atestât di partecipazion. Pai fantats des superiôrs e je la pussibilitât di vè il ricognossiment dai credits formatifs pe ativitât extrascolastiche. Par vè informazions e par notâsi si pues clamâ il CIRF al numar 0432.556480 o ben mandâ un messaç di pueste eletroniche a cirf@uniud.it e sportel.furlan@uniud.it. Lis iscrizions a



son viertis fin ai 26 di Lui (plui details sul sît istituzionâl www.cirf.uniud.it o su la pagjine Facebook Uniud par Furlan).